

Monday, April 28, 2025

Time - 2:30pm - 2:35pm

REGIONAL NEWS BULLETIN

(MIDDAY)

ATL ROAD STIR

Lunglei MZP Headquarters huaihawtin tukin zing dar 7 atang khan Aizawl atanga Lunglei kalna kawngpui dan a ni.

MZP leh a thlawptute hian Pukpui-ah lirthei lut leh chhuak tur an dang a. MZP te hian ATL Road siamna tur cheng vbc 90 leh nuai 69 chu ATL Road siam na'n hman vek an duh laiin cheng Vbc 45 leh nuai 60 chauh dah a Mausen leh Pukpui inkar kawngpui kilometre 14 chin chauh siam na'n Sorkar in a dah chu an hriatthiam loh thu an sawi a, MZP te hmalakna hi Lunglei mipui tam takin thlawpin Maxi-Cab Service pawhin vawiin hian an thlawpna lantir nan an service lo a ni.

Aizawl atanga Lunglei panna kawngpui dan hi Lunglei Thalai Pawl, Chhimbial Chhantu, Hnahthial Thalai Pawl, Tlabung Maxicab Service te pawhin thlawp in tlan loh an tum thu an puang a. Chawngte khua a pawl hrang hrang 11 intelkhawm pawhin an thlawp thu an tarlang ve bawk.

Hetihlai hian PWD hotu thenkhat chuan cheng vaibelchhe 90 leh nuai 69 chu Hmuifang PWD division huamchhunga Contractor Bagharetha Engineering Ltd. te hnathawh that loh avanga an dahkham an chawi leh a pung a ni tih sawiin Lunglei ta bik a ni lo an ti a. Mausen leh Pukpui inkar kawng siam na tur cheng Vbc 45 leh nuai 60 pawh chu pawh luh zawk ani tih an sawi.

Rorellai ZPM Southern Headquarters, Lunglei chuan ATL Road chungchangah chhim lam mipuite rilru natna chu awm an tih thu leh mipui rilru damna tur thutlukna sorkarin a siamsak hma chuan an party pisa-ah hna engmah thawh rih loh ni se an ti a, chhim mipuite beiseina angin ATL road siamna tur ruahman sak thuai turin sorkar an phut tih sawiin April ni 7 khan Lunglei West bialtu MLA leh ZPM Southern Hqtrs-in ATL Road bik enkawl tura an dah Pu T. Lalhlimpaia chuan ATL kawngpui chu ZPM Southern Hqtrs anga a mawhphurhna a nih angin sorkarin a siam dawn lo a nih chuan MLA atanga chawlh a hreh loh thu Lunglei leh chhim mipuite'n hriatpui an duh thu an Party chhung inkhawmah a lo sawi tawh a ni.

Aizawl atanga Thenzawl kaltlanga Lunglei panna kawngpui hi hun rei tak a chhiat hnuah a siamthat nan Lunglei mipuiten Bagharetha Engineering Ltd. te hnathawh that loh avanga an dahkham an chawi leh a pung cheng vbch

90 leh nuai 69 chu an phut a, hetihlai hian sawrkarin Aizawl khawpuia kawngpui siamthat nan cheng vbch 45 a hman avangin Lunglei mipuite an lungawilo hle a, kawng hrang hrangah lungawilohna lan tir niin vawiin Thawhtanni zing dar 7 atang khan tiamchin awmlovin ATL kawngpui dan a ni a, kawngpui dan hi Pawl hrang hrang leh Lunglei mipuite atangin thlawp a hlawh hle a ni.



MIZORAM POOR FEDERATION

Mizoram Poor Federation chuan Mizoram hmasawnna leh intodelhna tura ruahmanna nghet neia vawng tlat tu PWD Minister Pu Vanlalhlana chu chhuanawm antih thu an sawi.

He thu hi vawiina Aizawl Press Club-a Press Conference ah sawiin Mizoram Poor Federation President Pu Lawmthanga chuan PWD Minister in Mizoram hmasawnna tana a hnathawhah an lawm thu an sawi a, FCS&CA Minister Pu B. Lalhhanzova hmalaknaa Ration Card ennawn chu tha an tih thu sawiin Mirethei leh Mipui hmakhaw ngaia sawrkar hmalakna Mizoram Universal Health Care Scheme chu private damdawiin ten zawm vek turin an duh tih an sawi.

Mizoram Poor Federation hruaitute chuan Ministry hmasa lamah kawng siamthat te chu a panin a tlo loh thu an sawi a, Tun sawrkar kawng siamthat chu a chhah tha in kawng tha neih chu ram hmasawnna atan thil pawimawh tak a nih avangin hmasawnna duhtu PWD Minister Pu Vanlalhlana an nei chu lawmawm an tih thu an sawi a, sawrkar hmalakna thlawp zel turin mipuite an ngen tih an sawi baw.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni.

Zanin dar 6 leh a chanve-ah Chanchinthar hi puan leh a ni ang.



DRUGS SEIZED

Central YMA chuan kar hmasa chhung khan Heroin hawng 460 an man a, hemi kaihhnawihah hian mi 60 man an ni baw.

Central YMA Kumpuan hmalakna April ni 19 leh April ni 25 inkar khan No. 4 : Hawng - 460, Tictac bur – 107, Alprazolam tablet 10 leh Nitrazepam Tablet 40 man in heng bakah hian Local zu litre 360 bakah Ruihhlo kaihhnawihah hian mi 60 an man tel a, Home leh Ruihhlo enkawlina Center

hrang hrangah mi 13 dah luh niin Excise and Narcotics kutah mi 5 hlan an ni a, Counselling class kal mi 37 an awm bawk.

Ruihhlo ven kawngah hian Sawrkar pawhin nasa taka hma la in Excise Minister Pu Lalnghinglova Hmar chuan instagram kaltlangin Excise & Narcotics Department chuan ‘special mobile drive’ neiin, zan lamah Aizawl khawpui hmun hrang hrang tuam chhuakin an duty thin a ti a, Minister chuan Zu leh ruihhlo laka Mizoram a him nan sawrkar chuan theihtawp a chhuah zel tih sawiin Central YMA hnuaia ruihhlo dotute nen tang kawpin a khat tawkin operation an nei thin tih a sawi bawk.



HSLC RESULT

Mizoram Board of School Education chuan HSLC Result chu naktuk thawhlelni April ni 29-ah a tichhuak dawn.

MBSE chuan kar hmasa khan hriattirna tichhuakin, kum 2025 HSLC Examination result chu naktuk thawhlelni April ni 29 chhun dar 12 ah tihchhuah tum a ni a ti a, Result hi MBSE Office Chaltlangah leh website – www.mbse.edu.in leh www.mbseonline.com–ah te en theih a nih dawn bakah a mamawh tan result bu lei theihin a awm dawn tih mipuite a hriattir a ni.

